

痲瘋全書序一

痲瘋全書上下二卷。由廬陵王霞九自江西寄至粵東。言在江西已活數百人。囑爲刻印廣傳。校訂者爲高要何石卿茂才傳瑤也。石卿見此書驚喜。謂廣東多痲瘋。醫治者多係單方。從未見有如此書之明備者。石卿知醫。因校訂此書。已治愈一家三人。喜極請急付之梓。予謂此書於各症條分縷析。非單方治病者可比。必將全書了然於胸中。用藥方能得當。務望見此書者。多傳於知醫之人。施送日多。愈傳愈廣。活人功德。可限量耶。粵東多好善君子。諒必與鄙人有同心也。

道光二十五年次乙巳春正月敬業堂重刻謹誌

序二

余自幼愛治岐黃術。謂醫雖小道。有裨於人己。讀書人所宜旁及。顧不登門不索謝。據六經之法而治之。求方者日益衆。嗣以有妨舉業。乃力辭而置之矣。惟治癘則尤汲汲不遑。常恐其不我遇。夫癘疾也。得之者。父子離散。夫妻睽違。戚友避之。行道叱之。非若他疾只傷一人。癘實傳染常多。或傷隣友。或傷一家。至於無與爲婚而絕嗣者不少。張子云。疲癯殘疾。皆吾兄弟之顛連而無告者也。不其然乎。願治是疾。古今既少專書。方亦寥寥。而庸輩偶得一二方。私爲祕本。挾此以索重貲。及叩以病源藥性。茫然不

知其故。精醫之士。又或畏其穢汚而不經心。或目爲正報而託於緣定。使抱是病者。有病無藥。致自縊投水死者。往往有之。余甚憫焉。究心多年。治不下數百餘人。爰著此編。舉其綱。張其目。條分縷晰。三易寒暑。頗費苦心。閱是編者。豈惟可以治癘。亦於分經治病之道。可得其概矣。有心者廣而行之。亦吾輩隨地利人之一端也。歟。

嘉慶元年孟夏月初九日曉亭主人書

序二

疾病之最慘最酷最易傳染而不忍自覩者。曰瘟疫。曰癘瘋。仲景瘟疫論。兵燹後盡失其傳。賴姑蘇吳又可特闢手眼。破叔和之藩籬。接長沙之心傳。參伍錯綜。委曲詳明。至今兆民賴以生全。獨癘瘋幾千百年明哲代出。無不爲之束手。聖如丹溪。治效四人。後三人猶復發而斃。以故患是疾者。咸里惡聞。骨肉遠避。痛苦之餘。求死不能。求生不得。甚至有投水懸梁。自戕其命。而啣冤地下者。則癘瘋之慘酷。比之瘟疫。殆尤甚已。乾隆嘉慶間。是疾吾省罕見。今則村落中十里五里。處處咸有。天地殺厲之氣。愈積愈盛。或目爲正報。或譏爲劫運。余竊非之。夫病各有因。外而大淫。因乎天也。內而七情。因乎人也。癘瘋則地氣所主。而天與人從此應之。大抵染是疾者。惟東南最盛。大河以北未有也。豈非東南地勢卑下。魚鼈龍蛇之蟠踞。濕極生熱。熱極生濕。二氣互蒸。常則爲嵐。爲霧。爲烟。瘴。變則另有一種濁

氣穢氣毒氣。與夫似濁非濁。似穢非穢。似毒非毒之氣。從地而起。人在氣交中。如魚在水。無隙可避。輕則傷及肌膚。重則傷及筋骨。又重則傷及臟腑。苟非有人焉。仰觀俯察。洞見其源。而設法以救之。豈能使民無夭札哉。余賦性素懶。攻舉子業。亦不求甚解。而於岐黃術獨好深湛之思。每念百病皆有方法。何癘瘋一門。獨無專書行世。豈天道之好殺與。抑人事有未盡與。嘗以此語質之全石劉席觀先生。先生曰。是書吾家藏有善本。係廬陵蕭君曉亭所手著。治經千人。應如桴鼓。嘗欲刊印萬本。遍送鄉場。應試諸公。惜有志未逮。臨終以其書授余。謂余能不負所託。今老矣。恐此書不成。無地見曉亭矣。子其有意乎。余聞而喜出望外。急索其書而讀之。見其論證精細。處藥和平。而又曲盡變態。得心應手。洞垣窺牆之技。不是過矣。爰集同人註而梓之。斯亦儒者隨地濟人之端乎。抑余因之有感矣。方今天下經驗奇方。當不止此。如蕪湖之藥酒。通州之眼藥。以及化痞諸膏。要皆私諸一家。以爲子孫射利之途。曉亭不傳其後嗣。而獨傳先生。先生亦不傳其後嗣。而獨傳余。非曉亭不能知先生。非先生亦不能不負曉亭。而諸君子之慷慨好義。俾余與先生與曉亭終相與有成也。亦非偶然矣。是爲序。

道光十二年庚寅秋後一日鈴陽春臺袁世熙序

序四

先大父醒初公。素稱博雅。廷試南歸。由蘇杭書肆。購有古今奇書。除經史百家外。如天文地理以及醫卜星數。無不精通其術。先君子曉亭公。幼承庭訓。口授最真。而於醫道更詳。蓋以醫乃仁術。可以濟人。誠如范文正公所謂願爲良醫也。嗣是先君子醫人神效。素不受謝。遠近踵門求方者益衆。惟治癘一途。尤殫精竭力。旁搜遠索。又得各家祕本。斟酌損益。歷數寒暑。而始集其成。而更遵仲景六經之法治之。以故醫癘百不失一。欲公諸世。誠恐傳非其人。或以此爲射利之門。一再傳後。有失其真者矣。鈴陽劉全石先生。孝友成性。古道照人。與先君子氣誼相投。爲知心交。而於天文地理醫卜星數。互相參稽。如是者有年。歲辛酉。先君子病篤。遣价迎全石先生於分宜。至則縱論古今。其病若失。一夕謂先生曰。爾我治癘一法。所活不下數百人。欲將所註癘疾輯要。及所記癘疾備要二卷。俟歲貢後。刊刻萬本。即在江西鄉場分送。應試者。又聞粵東多癘。亦印送萬本。遍送鄉試諸公。今墓木拱矣。無後望矣。若成此事。非君未有可託者。乃檢出輯要備要二書。再拜而授之。先生亦再拜而受之。二人握手淚下。馨等亦泣而誌之。不敢忘。不逾月。先君子捐館舍矣。厥後全石先生罕至吉州。而馨等兄弟亦橐筆遨遊羊城。十有九年。饑軀依人。未能刊布其書。今仲夏先生命其主器東昌君。冒暑來舍。道及同邑孝廉袁春臺先生。欲集同人刊布此書。馨聞喜甚。愧甚。愧者。愧馨兄弟徒讀父書。不能成先志也。喜者。喜善與人同。得有全石先生與孝廉袁君也。乃檢先君子手定原稿。交東昌君。

其再拜授受亦如前。他日刊刻成書。分布天下。俾癘疾不降。民無夭札。是卽全石先生與孝廉袁君之功也。亦卽吾祖父之志也。而馨等兄弟何有焉。是爲序。

道光十年歲次庚寅季夏朔日廬陵一山氏蕭桂馨謹識

序五

鈴陽劉全石先生。博雅士也。亦端慤人也。自棄去舉子業。究心於天文地理。醫卜星數。特見精妙。垂老時在舍親歐陽質中昆季家。得挹其道範。數相把晤。忘年結契。並其家嗣東昌君。亦得間與道款。往時與廬陵廩膳生蕭君曉亭先生相友善。曉亭遂於醫。於治癘一門。尤屬專家。癘門本少傳書。亦乏良方。乃遵仲景六經之法。苦心冥索。三易寒暑。分列綱目。詳加註釋。成書二卷。名曰癘疾輯要。癘疾備要。以之治癘。百不失一。嘗言全活不下數百人。欲刻行世。未遂厥志。以其書託全石先生梓行。以先生敦氣誼。重然諾。謂能不負所託。後先生商諸家孝廉春臺君。春臺偕同志慇懃就梓。未及付劂。而先生捐館舍矣。春臺亦頻歲留滯京邸。此舉遂不果。今歲之暮春。東昌君已將是編授諸梓人。因丐一言以識顛末。行見書成。不脛而走天下。天下之染是疾者。立起沉疴。何厚幸也。東昌君可謂克廣德心。能成父志矣。全石先生真可謂有子。並幸能不負死友矣。事之成廢有時。殆亦有數存乎其間。信夫。

道光十六年暮春月宜陽曉村袁壯輿謹識

瘋門全書

廬陵蕭曉亭先生著 鈐陽春臺袁世熙編定

鈐陽全石劉旭珍參證 紹興裘韻初重校

述古八則

素問脈要精微論曰。脈風成爲癘風。又曰風塞容於脈而不去。名曰癘風。癘風者。營衛熱附。其氣不清。故使鼻梁壞而色敗。皮膚瘍潰。

長刺篇論曰。大風骨節重。鬚眉墮。名曰大風。

靈樞曰。癘風者。數刺其腫上已刺以銳針針其處。按出其惡氣。腫盡乃止。常食方食。毋食他食。

千金翼者婆治惡病曰。疾風有四百四種。總而言之。不出五種。卽是五風所攝云。何名五風。一曰黃風。二曰青風。三曰白風。四曰赤風。五曰黑風。其風合五臟。故曰五風。五風生五種蟲。黃風生黃蟲。青風生青蟲。白風生白蟲。赤風生赤蟲。黑風生黑蟲。此又五種蟲。食人五臟。若食人脾。語變聲散。食人肝。眉睫墮落。食人肺。鼻柱崩倒。鼻中生息肉。食人腎。耳鳴啾啾。或如車行雷鼓之聲。食人皮。皮膚頑痺。食人筋。肢節墜落。五風合五臟。蟲生至多。人於骨髓。來去無礙。壞於人身。名曰疾風。疾風者。卽癘病之根本也。病之初起。或如針椎所刺。名曰刺風。如蟲走。名曰遊風。遍身掣動。名曰疇風。不覺痛痒。名曰頑風。肉起如桃李小棗核。從頭起者。名曰頰風。從兩足起

者。名曰逆風。如連錢團圓。赤白青烏斑駁。名曰癩風。或遍體生瘡。或如疥癬。或如魚鱗。或如榆莢。或如錢孔。或痒或痛。黃汗流出。臍節壞爛。悉爲膿血。或不痒不疼。或起或滅。青黃赤白黑。變易不定。病起之由。皆因冷熱交通。流入五臟。通徹骨髓。用力過度。飲食根違。房室不節。虛動勞極。汗流遍體。因此濕積。熱徹五臟。飲食雜穢。蟲生至多。食入五臟骨髓。皮肉筋節。久久壞敗。名曰癘風。丹溪云。癘疾須分在上下。在上者以醉仙散。取臭惡血於齒縫中出。在下者以通天再進散。取惡物。虬蟲於穀道中出。所出須有上下道路之異。然皆不外於陽明一經而已。看其證之。上身先多見者。病在上也。下身先見多者。病在下也。上下同得者。病在上下也。何則。夫陽明主胃。與大腸無物不受。多氣多血。邪風之傷人也。氣受之。上身多血受之。下身多氣血俱受。上下皆多。自非醫者神手。病者鐵心。罕有效者。夫氣爲陽。爲衛。血爲陰。爲營。身半以上。陽先受之。身半以下。陰先受之。是故再造散。治病在陰分。用皂角刺逐風毒於營血中。肝藏血。惡血留注不能運動。故蟲生焉。必用此以治其臟氣。殺蟲爲主。以大黃引入腸胃。利出瘀惡蟲物。醉仙散。治病在陽分。用牛蒡子驅風毒惡瘡於遍身。胡麻逐風補肺。潤皮膚。蒺藜去惡血。身體風痒。通鼻氣。防風治諸風。瓜蒌根治瘀血。消熱腫。枸杞消風熱。解毒瘡。蔓荊子逐賊風。苦參解熱毒。然必藉輕粉爲使。逐出胃腑惡毒臭穢之物。殺所生之蟲。循經上行。至牙齒軟薄之分。而出其臭毒之涎水。服藥後。若損齒則以黃連末措之。或先佐入劑中。以解輕粉之

毒。輕粉在醉仙散中。有奪旗斬將之功。遂成此方之妙用。非他方所可並及者。

薛新甫曰。癩瘍所患。非止一臟。然其氣血無有不傷。而其證亦無有不雜。况積久而發現於外。須分經絡之上下。審氣血之虛實。不可概施攻毒之藥。當先助胃壯氣。使根本堅固。而後治其瘡可也。

癩瘍當知有變有類之不同。而治法有汗下砭刺灸補之不一。蓋類證當審輕重。變證當詳真偽。而治法又當量其人之虛實。究其病之源委。而施治焉。夫虛者正氣虛也。實者邪氣實也。

癩瘍針砭之。張子和以一汗抵千金。蓋以針血不如發汗之週遍也。發汗針血二者一律。若惡血凝滯在肌表經絡者。宜刺宜汗。取委中出血則效。若惡毒蘊結于臟。非蕩滌其內。則不能療。若毒在外者。非刺遍身患處。及兩臂腿腕手足指縫。其毒必不能散。若表裏俱受其毒者。非外針內泄。其毒決不能出透。若上身患多。宜用醉仙散使內蓄惡血於齒縫中出。又刺十指甲並臂腕以去肌表毒血。下身患多。宜用再造散。令惡血虻蟲於穀道出。仍針足指縫並腿腕。隔一二日再刺之。以血赤爲度。如有寒熱頭痛等證。又當因證而施治焉。

癩瘋二十一論

削去八條增入八條改正十三條

癩瘋者。古人呼爲癩風。又名惡疾。廣東呼爲大癩瘋。又名疙瘡。外省或呼爲大皮瘋。又曰癩皮瘋。染是疾者。夫妻兄弟子女離散。戚友避之。行道叱

之顛連無告至此極矣。醫者不知受病之源。或言傳染。或言風水。雖非無因。然未必皆此之故也。蓋東南地卑近水之處。此疾尤甚。天氣較炎。地氣卑濕。濕熱相搏。乘人之虛。入於營衛。衛氣受之。則上身證多。營血受之。則下身證多。營衛俱受。上下俱多。此其大概也。究之無論上下。必氣虛邪始乘之而入。血虛邪始乘之而凝。結於筋絡。積於肌肉。腠理之間。鬱久生熱。故此病血熱居多。又或臥於濕地。受其熏蒸。或汗出後。浴洗冷水。或濕衣沾身。或房勞後。浴冷臥濕。皆能受病。初則血滯不行。漸生麻痺。日久漸大。不知痛痒。針之不痛。今年發手。明年發足。或如癰形。如或瘡癩。或似蟲行。或筋痛肉跳。久則傷形變貌。面生紅堆。耳或長大。時如蟬鳴。臉如酒醉。又如油塗。手拳脚跛。口喎眼斜。鼻塌唇翻。不早治成廢疾矣。

癘風古無治法。丹溪止用醉仙散。再造散二方。但服輕粉。多生輕粉毒。恐一疾未愈。又添一疾。又有大黃皂刺牽牛之類。然惟實者可用。氣血虛者。反耗元氣。東垣海藏各有數方。亦兼他病而治之。至耆婆所列各方。藥多難製。外此方書所載。亦殊寥寥。若薛新甫癘瘍機要。詳於變證類證。而略於正治。要之濕熱相搏。邪氣乘虛而入。總以涼血和血爲主。驅風驅濕爲佐。審元氣之虛實。按六經以分治。斯治癘之要道也。病之輕者。背腰手足之間。形如疥癬。不痛不痒。頭面或似蟲行。或手足骨節間。撞之如刺痛。或時作熱。拭之又無。病之重者。手足生瘡。肉中結核。臉紅耳腫。口喎眼斜。至年久病深。壞形變貌。鼻塌肉崩。手指脫落。足底爛穿。則難治矣。又身有麻

木數月卽發外。雖重易治。丹溪謂麻木乃癘疾之本是也。又手有痺肉則虎口肉珠必焦。左手痺則左虎口肉焦。右手痺則右虎口肉焦。輕則肉珠瘦小。重則肉珠消陷。若兩手俱無痺肉。則虎口肉珠俱全。此法止可看手之輕重。面背腿足之疾不驗之於此。

面帶紫色。常如醉人。且如油塗。俱有微浮。或黑而枯瘦。或黃而有浮光。其入身上必有麻木。或數月卽發。或數年。或數十年始大發。近發易愈。遠發難治。原於初起不信之故耳。

南人謂藥治不過三五年後必復發。俗云。此病只好治邪。不能除根。皆不通之論也。大凡染病者多貧。藥餌難繼。或半痊而囊空。或痊後不戒食物。不守禁忌。或治之未盡。有一二點痺肉未活。或痺肉活而皮色未復原。以致復作。此疾最忌房事。蓋精乃骨髓。精洩則毒氣乘虛而入。若不斷此。必不能治。愈後不再戒。一年必復發。

輕者脚未吊。手未拳。鼻未塌。肉未崩。證本可治。而服藥無效。或氣虛未補。其氣血虛未補其血。又或兼有別證。當詳審之。

病在外而浮者易愈。在內而沉者難痊。氣血盛者易治。衰者難治。在外而浮者。麻木不久尙淺。重扭則痛。毒發在外。或癩或紅堆。卽遍身濕爛。亦可速愈。在內而沉者。痺肉沉內。稍稍緣開面上。手足背腿各處紅紫之色。浸入肉內。不但現於皮膚。重扭不疼。針刺不知。治之必須一二年方可全愈。死肉紅堆。刺淺卽覺痛者。不必爛。刺深不知痛。刀割不知疼。鼠咬不覺。宜

用藥爛去。然後用膏藥貼之。用生肌藥敷之。卽易平復。未見疾而有臭氣。逼人。此種一發必甚。亦易傳染。蟲乃肝經風熱所生。肝不受病則無蟲。謂瘋病無蟲固非。謂瘋病有蟲亦謬。損筋者。手拳足痿。手拳不硬。以手按之。卽直。治之得法。手可復伸。硬者難伸。脚吊痿者。不焦可復舊。焦者難復。手焦亦然。折骨者。手足脫落。四肢如冰。骨節挺露。形如枯樹。名爲濕墜。濕閉久而生熱。熱鬱久而生痰。輕則鼻塞。重則聲啞。法宜清利肺經。痰自息。塞自通。啞自開。

肺主氣。肝藏血。氣行則血行。血凝因氣滯。肺主皮毛。肝主經絡。肝盛而脾胃亦病。故現於面。面屬陽明胃也。發於四肢。四肢脾也。筋弛皮痒。肝之本證。聲啞鼻塞。肺之本證。折骨則腎病也。其初必由肝肺而致。又肝木能自生風。生蟲。肺失治節。故眉落筋弛。治瘋者。當以肝肺二經爲主。

大小便不同器。人皆知之。外此病人吃煙。亦宜避之。不病人吃煙。見病人亦宜避之。病人之尿。不可淋煙草。淋則吃者必生瘋病。此則人所不知。或謂人之氣血。各歸其經。豈能傳染他人。不知疥癬尙有傳染。何況瘋乎。父精母血。交媾成形。而所生男女。或染或否。何也。病在內者無不傳。病在外者間有不傳。未病而先生子。能禁忌者不傳。至云瘋病無及子女者。則非也。精血交媾。夫妻豈有不傳。男傳女者少。女傳男者多。何則。女人因月水下而能洩其毒。故瘋病者少。或言婦人賣瘋之說。理亦可信。又言地土所產。室女亦必賣瘋。則終身不患此病。而所賣之人則生瘋。若果有此。當於

室女經水初至時。卽用藥治之。以去血熱爲主。以平祛肝經自生之風爲佐。但得一次現面則毒出矣。切不可用瘋門套藥。用之反致成瘋。存此以質高明。

氣血俱實。脈實而有力。表劑汗之。使從表解。峻劑下之。使從二陰而出。次以清熱驅風。養血之劑爲丸。相間而服。又重者。用藥煎水熏洗。自當速效。若氣血俱虛者。以補血和血爲主佐。以涼血驅風之品。緩緩治之。亦無不效。大凡治瘋發出者易治。服藥卽發亦易愈。

熏洗之法。務要露出頭面。凡痺肉無汗者。血死濕閉故無汗。汗卽血也。血枯之人。不可大汗。先養其血。血漸復。則可熏洗。若多服丸藥。久久汗出如常。不熏洗亦可。

痺者肉木而不痛。若不針出死血。勢必潰爛。膿血淋漓。但針出黑血。不妨再針。若針出鮮血。卽止。須一次針一處。不可連針數處。恐去血過多。血盡而人亡也。大抵爛之則效速。不若針之效。雖遲較爲穩當也。

灸法。先將痺處以墨點記。然後以生薑一片貼上。用艾丸灸之。覺痛卽止。但痺少則可灸。痺多則不勝其灸。當以服丸藥爲主。

死肌痺肉。寒濕永結。久則遍身發泡。爛而爲瘡。膿水淋漓。名曰風瘡。又名疔瘡。須用藥撒之。令膿水乾。則結痂。久之痂自脫落。亦有服藥得法。泡破而無膿水者。至狀若豆瘡。硬如牛乳。肉豆結核者。不妨針出惡血。針而不愈。以藥爛之。爛後以膏藥貼之。

男人血少。以養血和血爲主。驅風行滯爲佐。女人血多。以活血行血爲主。驅風燥濕爲佐。男人忌房事。女人尤忌。女不禁房事。恐受胎一二月。尙不知其虛實。投以瘋藥。而胎墜矣。胎墜則血氣俱虛。毒更乘虛而入。而病愈重。况男女交接。毒又必傳染乎。又凡女人。必兼一二味調經之品。

癩雖惡疾。治之得法。卽常用平和之藥。亦無不效。蛇蝎猶可用。至若砒霜。蜈蚣。斑蝥。輕粉之劑。病之極重者。不得已而用之。不可恃此以爲常。川烏。草烏。附子。肉桂。虛寒之人。病愈後以之。結功則可。以之治病則不可。蓋辛熱之品。能燥血耗血。血虧而病愈加。不可不知。

發毒之物助毒。生冷之物凝血。凝滯之物固毒。煎炒之物助火。皆宜切戒。二三年。若自死禽獸之肉。終身宜戒。母猪肉亦然。

瘋疾傳染。事故常有。但迴避可也。不共用器。不同飲食。各房各牀。儘力求治。寬以歲月。無不全愈。否則亦當調停處置。令衣食不缺。若夫妻離棄之事。切莫勸解。

癩疾。諺云。正報。又曰。現報。原非妄談。若自信罪愆難逃。果能矢志爲善。人力可以回天。卽自反無他過惡。亦當力行善事。善事者何。盡忠。盡孝。敬兄。信友。敦宗。睦族。守禮。守法。非誦經拜天。妄希福澤之謂。人能如此。不但病易愈。且爲後嗣種福。所益多矣。

癩瘋三十六種

重校者據原缺一症於附刻瘋門辨正中已補述之

〔大麻瘋〕唇翻齒露。眼扯脚吊。手足指脫。鼻梁崩塌。損形變顏。種種惡狀。

年深病重。無藥可治。必用毒藥攻之。久久方效。蒺藜散之類。

〔暑濕瘋〕手足先有麻木。次則身有死肉。或如瘡疹。或似疥癬。或皮肉常似蟲行。或耳腫長大。或虎口肉焦。身有紅塊紅堆。臉有紅雲油光。筋跳肉痛。遍身瘙癢。或起白屑。或起黑皮。此大麻瘋之次也。小神散主之。

〔紫瘡瘋〕手足無痺。耳臉紅光。身有雲斑。或有紫塊。或有紅塊。內紅外白。時浮時沉。或出風珠。或出風團。前方主之。

〔白瘡瘋〕遍身花白點。仍有痺肉。狀似汗斑。白轉紅。紅轉白。痺肉不甚死。非風濕。即輕粉毒也。治之當兼擦洗。立效。

〔紫癩瘋〕皮血光亮如波珠狀。近火必紅。眉髮先脫。手足麻痺。肉中結核。穿爛成瘡。愈而復發。以小神丸治之。

〔白癩瘋〕毛髮俱白。臉如傅粉。自少至老。發於遍身。四體一色。手足軟弱。間有紅粒。一發不治。又有輕粉毒亦類此。

〔隱瘋內發〕染者不覺。勞熱則紅。近火則光。耳臉常熱。足有痺肉。臉似蟲行。拭之不見。隱隱而出。一發即爛。小神丸主之。

〔乾瘋〕身有粗皮。臉淡紅色。身有痺肉。手足焦枯。

〔猪頭瘋〕臉紅耳腫。磊磊紅團。手足腫痺。身熱痰多。鼻塞聲啞。發之甚凶。治之易愈。

〔拔髮瘋〕眉髮脫盡。然後疾出。手足麻痺。身有紅塊。預穿脚底。耳熱眼跳。手拳足吊。痺痛無時。蒺藜散主之。

〔侵熱瘋〕初起勢驟。遍體蒸熱。然後病發。用通瀉之劑。佐以涼血。如臉有紅塊。以八寶丹治之。

〔侵寒瘋〕體既虛弱。因受地氣。地濕所侵。初亦不覺。身有痺肉。手足焦枯。肢體拘攣。蒺藜散主之。

〔癩癬瘋〕患如癩癬。遍身瘙痒。身多死肉。皮多麻木。久則拘攣。眉髮脫落。蒺藜散主之。

〔癩皮瘋〕如猪癩。有密疹。耳臉俱發。手足破爛。眉髮稀少。搔之皮飛。身體瘦弱。輕用搜風散。重則蒺藜散。

〔牛皮瘋〕皮破色淡。抓之如竹殼。不知痛痒。色如牛皮。面色蒼黃。手足瘦削。輕用蒺藜散。重則不治。

〔蛇皮瘋〕身如蛇鱗。足有破爛。紅而兼黑。身體瘦削。手足麻木。且多疲。輕用蒺藜散。重則不治。或食蛇中毒亦致此病

〔牛蹄瘋〕風癢多年。十指脫落。筋骨損傷。狀如牛蹄。不治。

〔雞爪瘋〕受病多年。血不榮筋。麻木不仁。十指拳曲。狀如雞爪。蒺藜散主之。

〔面遊瘋〕臉如蟲走。拭之不覺。身如虱咬。尋之又無。漸漸麻木。微發紅塊。大麻瘋之根也。用搜風散治之。

〔金錢瘋〕紅圈如錢。內紅外白。麻木不知。或則痛痒。婦人多患此證。因月事時受濕而發。或經水滯於皮膚。狗寶丹治之。

〔銀錢瘋〕塊如錢大。內紅外白。刺之無血。白色如銀。先發於身。後上面部。隱隱在內。輕用狗寶湯。重用蒺藜散。

〔胎毒瘋〕父精母血。遺毒子女。治法不一。相證用藥。

〔淫毒瘋〕原名傳毒瘋。夫妻傳染。身覺多痛痒。臉如蟲行。面時作熱。用八寶丹或

狗寶湯。

〔肺毒瘋〕大腸燥結。風痰時發。臉如酒醉。又現紅雲。眉毛先脫。四肢浮腫。用小神丸。

〔心毒瘋〕心經受病。面多紫雲。且多鼻衄。

〔肝毒瘋〕厥陰受病。傷目損筋。肉中結核。皮膚燥裂。或穿爛成瘡。以小神丸治之。

〔脾毒瘋〕太陰受病。四肢焦枯。虎口無肉。身多麻木。遍身紅癩。刺之又無血。髮稀足裂。輕用小神散。重則蒺藜散。

〔腎毒瘋〕少陰受病。脚底先穿。骨節疼痛。多因房勞傳染。或病已發。不禁房事。

〔血熱瘋〕又名血瘋。濕熱相搏。血凝氣滯。結於皮膚。發泡生瘡。且多痺肉。小神丸八寶丹主之。

〔疹毒瘋〕痘麻失調。餘毒流於肌肉。又或臥濕浴冷。麻木少而疹痘多。雖無甚利害。却難斷根。

〔瘰癧瘋〕一名松子瘰一名珍珠瘰。面有油光。疹粒如珠。身有死肉。重者粒大臉紅。用蒺